

## **Communicaziun da medias dils 9 da matg 2017**

Pertucca la nova purschida per scuviders:

20 tablas d'informaziun ed in prospect tier il marcauet da Reformaziun Glion – avon 500 onns ed oz

### **Il marcau dalla Reformaziun Glion ei promts per ses hosps**

**Sin la sesiun da stad ha il marcau dalla Reformaziun Glion completau il program d'occurrências per las festivitads da 500 onns cun ina purschida per scuviders. Ina tura tras il marcau vegl cun 20 tablas tier baghetgs historics ed in prospect original envidan a perscrutar il marcauet ier ed oz. Dalla partida ein ils commerciants dil marcau vegl da Glion, ils quals fan in beinvegni allas visitadras ed als visitaders sin ils fastitgs dalla Reformaziun.**

La honur d'esser in marcau european dalla Reformaziun, occupescha gia dapi in temps la gruppa da lavur, aschia il president communal *Aurelio Casanova*. La gruppa da lavur responsabla consista da represents dalla baselgia evangelica dil Grischun, dalla vischnaunca dad Ilanz/Glion, da Surselva Tourismus SA, d'Anna Catrina SA sco era dil Museum Regional Surselva. Nus sespruein da porscher supplementar als gronds eveniments ed ils guides per gruppas, era ina purschida per ils hosps dil di. En cooperaziun culla artista ed illustradra da Glion *Yvonne Gienal* eisi reussiu dad elavurar in prospect en fuorma d'in plan dil marcau vegl che plidentescha era famiglias e motivescha da far la tura. En collaboraziun cul *Museum Regional Surselva* ein las tablas d'informaziun existentas vid ils baghetgs historics vegnidadas remplazzadas entras novas inscripziuns per tudestg e romontsch. Il prospect „Entdecke das Refo-Städtli“ meina tier staziuns sco per exempel la Gassa Steffan Gabriel, sperasvi tier la Ringmauer e lu tier la baselgia S. Margareta, nua ch'ils discuers da cardientscha dils da Glion han giu liug anno 1526. Tier tut quei vegn communicau l'impurtonza dalla valeta da Glion al temps dalla Reformaziun, sco era tematisau il viver ensemen dallas confessiuns el decuers dils tschentaners.

### **Il marcauet 500 onns suenter Johannes Comander**

Dapi la sentupada dil reformatur Johannes Comander cugl avat catolic Theodul Schlegel a caschun dalla disputaziun da Glion ein quasi 500 onns vargai. Era oz vivan e lavuran numerus commerciants el marcauet pittoresc, che meinan stizuns attractivas, bars ed ustrias animadas, huslis menaschis da survetschs ed in museum multifar. Els tuts s'audan tier la Cuminonza d'interess dil marcau vegl Glion. Ils meinafatschentas ein spannegiai sils visitaders dil marcau european dalla Reformaziun e semtgan per els ina ni l'autra surpresa. Per la realisaziun dil prospect han els cooperau spontanamein, presentan lur purschidas a moda divertenta e selegran sin numerusas interessantas sentupadas. Il marcau dalla Reformaziun Glion ei promts per ses hosps! Ils prospects ein d'anflar tier las entradas dil marcau vegl, tier Surselva Tourismus alla staziun, en las stizuns da Glion ed en numerus auters loghens.

---

Per sclariments stat Marianne Fischbacher, Museum Regional Surselva a disposiziun telefonin 079 716 96 30